

四庫全書

子部

欽定四庫全書

冊府元龜卷六百五十一 宋王欽若等撰

貢舉部

清正 謬濫

清正

古者有興賢之書比其德行道藝而獻之於王王再拜而受乃知詳選之道不其重與洎乎奔競斯作登顯多濫乃有疾時態之流宕考才能於端實稽以經術抑其

浮華權要之地請托不行當宁賞嘆縉紳稱尚為國選士斯無媿焉故史稱得賢者有賞不肖者有罰良有謂矣

唐王師旦為考功員外郎冀州進士張昌齡王公理並有俊才聲振京邑而師旦考其文策全下舉朝不知所以及奏第等太宗恠無昌齡等名因召師旦問之對曰此輩誠有詞華然其體性輕薄文章浮豔必不成令器臣若擢之恐後生相效有變陛下風雅帝以為名言後

並如其言

韓休為起居舍人奉制考制舉人策執心公正取捨平
允不為豪右所奪遷給事中

韋陟為禮部侍郎好接後輩尤鑒於文雖詞人後生靡
不諳練曩者主司取與皆以一場之善登其科目不盡
其才陟先責舊文仍令舉人自通所工詩筆先試一日
知其所長然後依常式考覆片善無遺美聲盈路

席豫為考功員外郎典舉得士為時所稱

潘炎為禮部侍郎衛次公弱冠舉進士炎目為國士擢居上第

常袞代宗大厯中為禮部侍郎時宮中劉忠翼權傾內外涇原節度馬璘又累著功勳恩寵莫二各有親戚貢舉及兩館生袞皆執理不與人皆畏之

陸贄德宗時為兵部侍郎知貢舉時崔元翰梁肅文藝冠時贄輸心於肅與元翰推薦藝士升第之日雖眾望不愜然一歲選士纔十四五數年之內居臺省清近者

十餘人

高郢貞元末為禮部侍郎時應進士舉者多務朋游馳
聲名每歲各州府薦送後唯追奉讌集罕理其業郢性
專尤疾其風既領職拒絕請托雖同列通熟無敢言者
志在經藝專考程試凡三歲掌貢士進幽獨抑聲華淳
濫之風翕然一變

權德輿貞元十七年為中書舍人以本官知禮部貢舉
來年真拜侍郎凡三歲掌貢士至今號為得人

常貫之為右補闕憲宗元和元年與中書舍人張弘靖
考制策第其名者十八人其後多以文稱遷為吏部員
外郎三年策賢良之士又與戶部侍郎楊於陵左司郎
中鄭敬都官郎中李益同為考策官貫之奏居上第者
三人是三人言實指切時病不顧忌諱雖同考策者皆
難其詞直貫之獨署其奏遂出為果州刺史道黜巴州
刺史及為禮部侍郎凡二年所選士人大抵抑浮華先
行實由是趨競者稍息

許孟容為兵部侍郎權知禮部貢舉頗抑浮華

衛次公為中書舍人元和二年權知禮部貢舉斥浮華
進貞實不為時力所搖

鄭澣遷禮部侍郎選拔秀士時號得人

王起武宗會昌中正拜左僕射復知貢舉起前後四典
貢部皆選當代詞藝之士有名於時人皆賞其精鑒狗
公也

崔郾為禮部侍郎東都試舉人凡兩歲掌貢士平心閱

試賞拔藝能所擢者無非名士至大中咸通代為輔相
名卿者十數

崔瑾為尚書郎知制誥懿宗咸通中知貢舉選拔頗為
得人尋拜禮部侍郎

周和凝仕後唐為翰林學士知貢舉貢院舊例放榜之
日設棘於門及閉院門以防下第不逞者凝令徹棘啟
門是日寂無喧者所放多才名之士時議以為得人明
宗益加器重

王延後唐清泰中為中書舍人權知貢舉有崔頎者協
之子也授偃師主簿頎卑屑棄去數年應進士延將入貢
院見舊相吏部尚書盧文紀文紀素與協不睦謂延曰
舍人以謹重聞於時所以老夫去冬與諸相首以長者
聞奏然此一途取事者頗多面目說者云越人善泅生
子方晬乳母浮之水上或駭然止之乳母曰其父善泅
子必無溺今若以名下取徵泅之類也舍人當求實才
以副公望延退而唾曰盧公之言為崔頎也縱與其父

不悅致意何至此耶來春以願登甲科其仁而徇公皆此類也

張昭初仕晉為左丞少帝開運三年命知貢舉來歲屬契丹犯闕而諸侯受賂請託甚峻昭未嘗搖動但務公平時皆服其鎮靜得鉅儒之體

謬濫

舉不失德則曰能焉稱匪其人誠為濫矣况夫論辨多士總覈羣材為治亂之本源實邦國之大計固宜責以

名實審其否臧揚于王庭縻以好爵其有知識非遠采
擇不明心志既紛藝文莫辨附回天之勢采畫地之名
棄實務華雜良以楛物議非允官謗是興先茅之賞莫
承籍橐之愆用及其或制度乖正仕進違方既啟幸端
亦附于此

後漢順帝陽嘉元年尚書令左雄議改察廉之制限年
四十以上儒者試經學文史試章奏如有顏回子奇之
類不拘年齒於是濟陰太守胡廣等十餘人皆坐謬舉

免黜

晉惠帝永寧元年正月趙王倫僭位是歲賢良方正直言秀才孝廉良將皆不試計吏及四方使命之在京邑者太學生年十六以上及在學二十年皆署吏部縣二千石令長赤在職者皆封侯郡綱紀並為孝廉縣綱紀為廉吏

四月帝既復祚以國有大慶天下秀孝一皆不試時河東猗氏人王接舉秀才接以為恨元年初制揚州歲舉

二人諸州一人時以天下喪亂務存慰勉遠方孝秀不

復策試到即除署

既經畧粗定乃詔試經有才不中舉者免其太守其後孝秀莫敢應命有

送至京師者

皆以疾辭

南齊太祖東昏侯時因襲宋代限年之制鄉舉里選不
覈才德其所進取以官婚胄籍為先遂令甲族以二十
登仕後門以三十試吏故有增年矯貌以圖進者其時
士人皆厚結姻援奔馳造請寢以成俗

唐玄宗開元八年考功員外郎李納以舉人不實貶沁

州司馬時北軍勲臣葛福順有子舉明經帝聞之故試其子牆面不知所對由是坐貶

德宗貞元五年禮部侍郎劉太真貶信州刺史太真性怯懦詭隨其掌貢舉宰臣姻族方鎮子弟先收擢之又常叙陳少遊勲績擬之桓文大招物議因有斯貶

十一年禮部侍郎呂渭知貢舉結附戶部侍郎判度支裴延齡延齡之子操舉進士文詞非工渭擢之登第為正人唾鄙渭連知三舉後因入閣遺失請託文記遂出

為潭州刺史

穆宗元和十五年正月即位是年禮部侍郎李建知貢舉進取信非其人又惑於請託故其年不為得士竟以人情不洽遽改為刑部侍郎

長慶元年勅今年禮部侍郎錢徽所放進士鄭朗等一十四人宜令中書舍人王起主客郎中知制誥白居易等重試覆落十人三月丁未詔曰國家設文學之科本求才實苟容僥倖則異至公訪聞近日浮薄之徒扇為朋

黨謂之關節干擾主司每歲策名無不先定永言敗俗
深用興懷鄭朗等昨令重試乃求深僻題目以觀學藝
淺深孤竹管是祭天之樂出於周禮正經閱其程試之
文都不知其本事詞律鄙淺蕪類亦多其孔溫業等三
人粗通可與及第其餘落下今後禮部舉人宜准開元
二十五年勅及第人所試雜文并策先送中書門下詳
覆貶錢徽江州刺史

武宗會昌五年諫議大夫陳商權知貢舉放及第二十

七人三月勅戶部侍郎翰林學士白敏中重試覆落七人

宣宗大中九年吏部試宏辭舉人漏洩題目為御史臺所劾侍郎裴諗改國子祭酒郎中周敬復罰兩月俸料考試官刑部郎中唐扶出為虔州刺史監察御史馮顥罰一月俸料其登科人並落下

十四年中書舍人裴坦知貢舉奏放進士三十人考試官庫部員外郎崔芻言放宏詞登科一人時舉子尤盛

進士過千人然中第者皆衣冠士子是歲有鄭義則故
戶部尚書瀚之孫裴弘故相休之子魏管故相扶之子
令狐滈故相綯之子餘不能遍舉皆以門閥取之惟陳
河一人孤平負藝第於榜末諫議大夫崔瑄上疏曰伏
見新及第進士令狐滈是河中節度使檢校司空同中
書門下平章事令狐綯男舊名壽改名滈竊聞頃年暫
魯罷舉自父當重位而權在一門求請者詭黨風趨妄
動者邪朋雲集每歲貢闈登第在朝清列除官事望雖

出於絢取捨悉由於漉喧然如市傍若無人威振寰中
勢傾天下及絢去年罷相出鎮其日令狐漉於禮部納
卷伏以舉人文卷皆湏十月已前送納豈可父身尚居
樞務男私挾其解名干撓主司侮弄文法若宰相子弟
總合應舉即不合繼絕數年如宰相子弟不合應舉即
何預有文解公然輕易隱蔽聖聰將陛下朝廷為絢漉
家事伏恐奸欺得路孤直杜門非唯取笑士流抑亦大
傷風教伏請下御史臺子細推勘納卷及取解月日聞

奏臣職當諫署分合上聞疏留中不出

梁太祖開平三年五月勅禮部所放進士薛鈞是左司
侍郎薛延珪男方持省轄固合避嫌其薛鈞宜令所司
落下

乾化中翰林學士鄭珽連知貢舉鄴中人聶嶼與鄉人
趙都俱隨鄉薦都納賄於珽人報翌日登第嶼聞不捷
詬來人以嚇之珽懼亦俾成名

後唐莊宗同光三年三月勅今年新及第進士符蒙正

等宜令翰林學士承旨盧質就本院覆試仍令學士使
楊彥珞監試其月勅禮部所放進士符蒙正等四人既
慚羣情實干浮議近令覆試俾塞輿言及再覽符蒙正
庇成僚等程試詩賦果有疵瑕若便去留慮乖激勸儻
無升降即昧甄明况王徹體物可嘉屬辭甚妙桑維翰
殊無疵繆稍有功夫其王徹并為第一桑維翰第二符
蒙正第三成僚第四禮部侍郎裴皞放

明宗天成四年中書舍人知貢舉盧詹進納春闈狀內

漏失五經四人姓名罰一月俸

晉高祖天福三年崔沆權知貢舉時有進士孔英者行醜而才薄宰相桑維翰素知其為人深惡之及沆將鑠院禮辭於維翰維翰性嚴語簡謂沆曰孔英來也蓋慮沆悞放英故言其姓名以扼之也沆性純直不復稟覆因默記之時英又自稱是宣尼之後每凌轢於方場沆不得已遂放英登第榜出人皆誼笑維翰聞之舉手自抑其口者數四蓋悔其言也

周世宗顯德二年禮部侍郎劉溫叟知貢舉三月壬辰
勅尚書禮部貢院奏今年新及第進士李覃嚴說何儼
武允成王汾閻丘舜卿楊徽之任惟吉趙隣幾周度張
慎微王翥馬文劉選程浩李震等一十六人所試詩賦
文論策等國家設貢舉之司求英俊之士務詢文行方
中科名比聞近年已來多有濫進或以年勞而得第或
因媒勢以出身今歲所放舉人試令看驗果見紕繆須
至去留其李覃何儼楊徽之趙隣幾等四人宜放令及

第其嚴說武允成王汾閣丘舜卿任惟吉周度張慎微
王翥馬文劉選程浩然李震等一十二人藝學未精並
宜勾落且令苦學以俟再來溫叟失於選士頗屬因循
據其過尤合行譴謫尚可見恕特與矜容溫叟放罪其
將來貢舉公事仍令所司別具條種聞奏

四年屯田員外郎知制誥扈蒙試進策入鄉貢進士段
宏等內段宏賜同三傳出身先是詣匭言事者甚衆命
蒙以時務策試之蒙選中者四人帝覽之命樞密副使

王朴覆試唯留宏一人而已蒙由是坐奪俸一月

五年右諫議大夫劉濤知貢舉三月詔曰比者以近年
貢舉頗是因循頻詔有司精加試練所冀去留無濫優
劣昭然昨據貢院奏今年新及第進士等所試文字或
有否臧爰命詞臣再令考覈庶涇渭之不雜免玉石之
相參其劉垣單貽慶李頌祭緯張覲等詩賦稍優宜放
及第王汾據其文詞亦未精當念以涇魯剝落特與成
名能若谷陳保衡皆是遠人深可嗟念亦放及第郭峻

趙保雍楊丹安元度張昉董咸則杜思道等未甚苦辛
並從退落更修進以俟將來濤選士不當有失用心可
責授右贊善大夫俾省過以戒當官先是濤於東京放
榜後率其新令及第進士劉垣已下一十五人來赴行
在具以其所試詩賦進呈帝覽之以其詞多紕繆命翰
林學士李昉覆試故有是命

冊府元龜卷六百五十一

欽定四庫全書

冊府元龜卷六百五十二 宋 王欽若等 撰

奉使部

總序

周官小行人之職掌使適四方達天下之六節又行夫
掌邦國傳遽之小事凡其使也必以旌節使於四夷則
為之介故聘禮有使者上介次介之名春秋戰國雖或
兵交而使在其間矣自周及秦常以歲八月遣輜軒之

使採異代方言又其事也漢制奉敵書使者乘馳傳則使者之稱其來舊矣武帝遣中郎將建節往諭巴蜀乃副使者馳四乘之傳又遣謁者及博士大夫諫官御史廷尉太僕丞相掾等分行按察故有直指使者及八使美俗清詔之名繇漢而下靡常厥官委寄之殊泐襲不一蓋因時而建置非著令於悠久等威制度隨委任之輕重僚屬吏員稱職務之大小唐室以降踵事增名則有巡察黜陟採訪處置按察宣勞之類分道而往領命

尤重大率以交聘敵國通接殊鄰勞來遠方安輯新附
慰撫兵役分給賑賜採風俗之厚薄詢民事之勞逸究
吏治之能否察獄訟之寃正搜訪遺滯刺舉姦濫或購
求墜簡或奉行寵典予以宣暢皇風敦諭詔旨廣天聽
而斯遠俾物情之無擁若乃智略宏遠機用周敏洽聞
英藻清節慎行揖讓而中節徃復而合指引薦良士糾
劾非法感慨而自請罔憚脩塗縱橫而有辭用能專對
乘便見機而必果處危握節而靡渝績効著聞望實昭

顯增原隰而有耀被獎飾以攸宜允謂使乎斯可尚已
乃至靡居他境邂逅物故契闊奄忽人所共歎其有乖
違上意違受深耻專已而無簡黷貨而弗厭有損國威
乃罹邦憲是故歷代遣使誠難其人必簡帝心以將明
命者爾凡奉使部二十七門

達王命 宣國威

達王命

夫使乎之為善者在乎宣王靈達君命奉辭而無辱稱

指而獲考焉故周官之紀六節重行人之職小雅之歌
四牡榮使臣之選繇漢而下乃有循行郡國以布德音
馳驅絕域以論和好之亂邦之內有若平居抵逆城之
下曾不介馬其智勇見于辭氣其忠信通于神明故能
使倔強思柔姦雄易慮安反側之俗革携離之心紓患
以解紛懷荒而振遠自非辯可以專對智足以經物挺
不奪之志達應變之略又安能掉三寸之舌履不測之
險而舉無所憚克成其績哉

漢嚴助為中大夫會閩越攻東甌武帝出兵誅閩越淮南王安上書諫之是時漢兵遂出踰領會閩越王弟餘

善殺王降帝嘉淮南之意廼令助諭淮南王曰皇帝問

淮南王使中大夫王上書言事聞之朕奉先帝之休德

夙興夜寐明不能燭

燭也

重以不德是以比年凶菑害

衆菑古災字夫以眇眇之身託于王侯之上內有飢寒之民

南夷相攘

攘謂相侵奪也

使邊騷然不安朕甚懼焉今王深惟

重慮

惟思也慮計也

明太平以弼朕失稱三代至盛際天接地

人迹所及咸盡賓服藐然甚慙

藐武卓切遠也言不可及也

嘉王之

意靡有所終

靡無也終極也

使中大夫助諭朕意告王越事助

諭意曰今者大王以發屯臨越事上書陛下故遣臣助

告王其事王居遠事薄遽不與王同其計

薄迫也遽速也

朝有

闕政遺王之憂

言朝政有闕乃使王有憂也遺猶與也

陛下甚恨之夫兵

固凶噐明主之所重出也

重難也

然自五帝三王禁暴止

亂非兵未聞也漢為天下宗操殺生之柄

操執持也

以制海

內之命危者望安亂者印治

謂仰而望之讀曰印

今閩越王狼戾

不仁狼性貪戾凡言狼戾者謂貪而戾

殺其骨肉離其親戚所為甚多

不義又數舉兵侵凌百越并兼鄰國以為暴彊陰計竒

策入燔尋陽樓船

漢有樓船貯在尋陽也

欲招會稽之地以踐勾

踐之迹

先是越王勾踐稱霸中國今越王欲慕之

今者邊又言閩王率兩國

擊南越陛下為萬民安危久遠之計使人諭告之曰天

下安寧各繼世撫民禁毋敢相并有司疑其以虎狼之

心貪據百越之利惑於逆順不奉明詔則會稽豫章必

有長患且天子誅而不伐焉有勞百姓苦士卒乎

王者之兵

但行誅耳無有戰
鬪故云不伐也

故遣兩將屯於境上震威武陽聲鄉

音嚮屯曾上未會

言兵未盡集

天誘其衷閩王隕命輒遣使者

罷屯毋後農時

令及農時不待後也

南越王甚嘉被惠澤蒙休德

願革心易行身從使者入謝

革改也

有狗馬之病不能勝

服

謂朝服也

故遣太子嬰齊入侍病有瘳願伏北闕望大廷

以報盛德閩王以八月舉兵於治南

山名也今名東治屬會稽

士卒

罷倦

罷讀曰疲

三王之衆相與攻之因其弱第餘善以成其

謀至今國空虛遣使者上符節請所立不敢自立以待

天子之明詔此一舉不挫一兵之鋒不用一卒之死而

閩王伏辜南越被澤威震暴王義存危國此則陛下深

計遠慮之所出也事效見前

見顯也前謂目前

故使臣助來諭

王意於是王謝曰雖湯伐桀文王伐崇誠不過此臣安
妄以愚意狂言陛下不忍加誅使使者臨詔臣安所不

聞

先未聞者今得聞也

誠不勝厚幸

張騫為郎應募使月氏

月氏西域胡國也氏音支

與堂邑氏奴其父

堂邑姓也漢入其奴名其父下云堂邑父者蓋取主之姓以為氏而單稱其名曰父

俱出隴西經

匈奴

道由匈奴過

匈奴得之傳詣單于單于曰月氏在吾北

漢何以得往使吾欲使越漢肯聽我乎留騫十餘歲予妻有子然騫持漢節不失居匈奴西騫因與其屬亡鄉

月氏

屬謂同使之官屬鄉讀曰嚮

西走數十日

走謂奔走也不指知其道里多少故以日

數言也

至大宛大宛聞漢之饒財欲通不得見騫喜問欲

何之騫曰為漢使月氏而為匈奴所閉道今亡唯王使人道送我誠得至反漢漢之賂遺王財物不可勝言大宛以為然遣騫為發道譯抵康居

抵至也

康居傳至大月

氏大月氏王已為胡所殺立其夫人為王既臣大夏而

君之

以大夏為臣
為之作君也

地肥饒少寇志安樂又自以遠遠漢

殊無報胡之心

下遠音
于萬切

騫從月氏至大夏竟不能得月

氏要領

要一遙切衣要也領衣領也凡衣者則執要與
領言騫不能得月氏意趣無以持歸於漢故以

要領
為喻

留歲餘還並南山欲從羌中歸

並音步
浪切

復為匈奴

所得歲餘單于死國內亂騫與胡妻及堂邑父俱亡歸

漢拜騫大中大夫堂邑父為奉使君

後漢來歙光武時為大中大夫建武五年持節送馬援

奉璽書於隗囂囂遣子恂時入侍

趙岐為太僕獻帝西都李傕專政使太傅馬日磾撫慰天下以岐為副日磾行至雒陽表別遣岐宣揚國命所到郡縣百姓皆喜曰今日乃復見使者車騎是時袁紹及魏太祖與公孫瓚爭冀州聞岐至皆自將兵數百里奉迎岐深陳天子恩德宜罷兵安人之道又移書公孫瓚為言利害紹等各引兵去皆與岐期會雒陽奉迎車駕岐南到陳留得篤疾經涉二年期者遂不至興平元

年詔書徵岐會帝當還雒陽先遣衛將軍董承修理宮
室岐謂承曰今海內分離唯有荊州境廣地勝西通巴
蜀南當交趾年穀獨登兵人差全岐雖迫大命猶志報
國家欲自乘牛車南說劉表可使其身自將兵來衛朝
廷與將軍并心同力共獎王室此安上救人之策也承
即表遣岐使荊州督租糧岐至劉表即遣兵詣雒陽助
修宮室軍資委輸前後不絕

蜀費詩捷為人為益州前部司馬先主為漢中王遣詩

拜關侯為前將軍侯聞黃忠為後將軍侯怒曰大丈夫終不與老兵同列不肯受拜詩謂侯曰夫立王業者所用非一昔蕭曹與高祖少小親舊而陳韓亡命後至論其班列韓最居上未聞蕭曹以此為怨今漢王以一時之功隆崇於漢室然意之輕重寧當與君侯齊乎且王與君侯譬猶一體同休等戚禍福共之愚謂君侯不宜計官號之高下爵祿之多少為意也僕一介之使銜命之人君侯不受拜如是便還但相為惜此舉動恐有後

悔耳侯大感悟遽即受拜

陳蕭乾為給事黃門侍郎永定初熊曇朗在豫章周迪在臨川留異在東陽陳寶應在建晉共相連結閩中豪帥徃徃立砦以保高祖甚患之乃令乾徃使諭以逆順并觀虛實將發高祖謂乾曰建晉恃險好為姦宄方今天下初定難便出兵昔陸賈南征趙佗歸順隨何奉使黥布來臣追想清風髣髴在目况卿坐鎮雅俗才高昔賢宜勉建功名不煩更勞師旅乾至曉以逆順所在渠

帥並率部衆開壁款附

後魏崔頤太武時為大鴻臚持節策拜楊難當為南秦王奉使數返光揚朝命帝善之及驃騎大將軍樂平王丕等督諸軍取平上邽使頤齎詔於丕前喻難當奉詔李順太武時為太常策拜涼州沮渠蒙遜為太傅涼王使還未幾拜四部尚書延和初使涼州沮渠蒙遜遣中兵校尉楊定歸白順曰年衰多疾舊患發動腰脚不隨不堪拜伏三五日消息小差相見順曰王之年老朝廷

所知以王祗執臣禮別有詔旨豈得自安不見上使也
蒙遜翌日延順入至庭中而蒙遜箕坐隱几無起動之
狀順正色大言曰不謂此叟無禮乃至於是今則覆亡
之不恤敢凌侮天地魂神逝矣何用見之將握節而出
蒙遜使歸追順於庭曰太常既雅恕衰疾傳云朝廷有
不拜之詔是以敢自安耳若太常曰爾拜爾跪而不祗
命斯乃小臣之罪矣順答曰齊桓公九合諸侯一匡天
下周王賜胙命曰伯舅無下拜而桓公奉遵臣節降而

拜受今君雖功高勲厚未若小白之勤朝廷雖相崇重
未有不拜之詔如便偃蹇自大此乃速禍之道非圖久
安之計若朝廷震怒遂相吞滅悔何及哉蒙遜曰太常
規之以古烈懼之以天威敢不翹悚敬聽休命遂拜伏
盡禮

鹿愈孝莊帝時為殿中侍御史監臨淮王或軍時梁豫
章王綜據徐州綜密信通或曰欲歸欵綜時為梁武愛
子衆議咸謂不然或募人入報驗其虛實愈遂請行曰

若綜有誠心與之盟約如其詐也豈惜一人命乎時徐州始陷邊方騷擾綜部將成景雋胡龍牙並搃彊兵內外嚴固愈遂單馬間出徑趣彭城未至之間為綜軍主程兵潤所止問其來狀愈答曰兵交使在自昔通言我為臨淮王所使須有交易兵潤遂先遣人白龍牙等綜既有誠心聞愈被執語景雋等曰我每疑元略規欲歸城

元略魏中

山王畧也

將驗虛實宜遣左右為元畧使入魏軍中

喚彼一人其使果至乃令人詐畧身在一深室詭為患

狀呼使戶外令人傳語時略始被梁武追還綜又遣腹
心梁話迎愈密語意狀令善酬答引愈入城詣龍牙所
時日已暮龍牙列仗舉火引愈曰元中山甚欲相見故
令喚卿又曰安豐臨淮將少弱卒規復此城容可得乎
愈曰彭城魏之東鄙勢在必爭得否在天非人所測龍
牙曰當如卿言復詣景雋住在停愈在外門久而未入
時夜已久星月甚明有綜軍主姜桃來與愈語曰君年
已長宿又充今使良有所達元法僧魏之微子拔城歸

梁梁主待物有道乃舉手上指今歲星在斗斗吳之分
野君何為不歸梁國我令君富貴愈荅曰君徒知其一
未知其二法僧者莒僕之流而梁納之無乃有愧於季
孫也今月鶉首斗牛受破歲星木也逆而剋之君吳國
敗喪不久且衣錦夜游有識不許言未盡乃引入見景
雋曰元中山雖曰相喚不懼而來何也荅曰昔楚伐吳
吳遣慶繇勞師今者此行略同於彼又曰游歷多年與
卿先經相識仍叙緣繇景雋便記引愈同坐謂愈曰卿

不為刺客也荅曰今者為使欲返命本朝相刺之事更
卜後圖為設飯食雜果愈強飲多食向敵數人微自夸
矜諸人相謂曰壯士哉乃引向元畧所一人引入戶內
指牀令坐一人別在室中出謂愈曰中山有教與君相
聞愈遂起立使人謂愈曰君但坐愈曰家國王子豈有
坐聽教命使人曰頓首君我昔有以向南且遣相喚欲
聞卿事晚來患動不獲相見愈曰旦奉音旨冒險祇赴
不得瞻見內懷反側遂辭而退須臾天曉綜軍主范勗

景雋司馬楊驃等競問北朝士馬多少愈云秦隴既平
三分靜晏今有高車白眼羌蜀五十萬齊王孝陳留崔
延伯李叔仁等分為三道徑趣江西安樂王鑒李神領
冀相齊濟青光羽林十萬直向瑯邪南出諸人相謂曰
詎非華辭也愈曰可驗崇朝何華之有日晏令還景雋
送愈上戲馬臺北望城壘曰此河城之固良非彼軍士
所能圖擬卿可語二王迴師改計愈曰金墉湯池衝甲
彌巧貴守以仁何論險害還軍於路與梁話誓盟契約

既固未旬綜果降

後周楊薦為太祖帳內都督帝遣僕射趙善使蠕蠕請
婚善至夏州聞蠕蠕主於東魏欲執使者善懼乃還帝
乃使薦往賜黃金十斤雜綵三百疋薦至蠕蠕責其背
惠食言并諭結婚之旨蠕蠕感悟乃遣使隨薦報命焉
庫狄峙為侍中時蠕蠕滅後突厥強盛雖與太祖通好
而外連齊氏帝又令峙銜命諭之突厥感悟即執齊使
歸諸京師

隋柳裘為內史大夫時尉遲迥作亂天下騷動并州總管李穆頗懷猶豫高祖令裘往諭之裘見穆盛陳利害穆甚悅遂歸心於高祖

蘇威為納言時突厥都藍可汗屢為邊患使威至可汗所與結和親可汗即遣使獻方物以勤勞進位大將軍閻毗為殿內丞征遼之役毗領虎賁郎將典宿衛時衆軍圍遼東城帝令毗詣城下宣諭賊弓弩亂發所乘馬中流矢毗顏色不變辭氣抑揚卒事而去

唐溫造河內人德宗建中中為彭門張建封所禮時李
希烈用兵四劫多所陷沒天下城鎮恃兵者皆欲動搖
或自立帥請節德宗患之以范陽劉濟方推忠誠但不
能盡達朝廷倚賴之意乃密詔建封選賢德有識之士
往諭之建封乃強署造節度參謀使于幽州造與語未
訖濟俯伏流涕曰濟僻在遐裔不知天子神聖大臣忠
蓋願得率先諸侯效以死節造還建封以其名上聞乃
馳驛入奏

孔巢父建中末為給事中兼御史大夫魏博宣慰使巢父博辯多智對田悅之衆陳逆順利害君臣之道士衆愧悚喜拊曰不圖今日復覩王化及就宴悅酒酣自矜其騎射之藝拳勇之畧因曰若蒙見用無敵不摧巢父謂之曰若如公是言而不早歸國者但為一好賊耳悅曰為賊既曰好賊為臣當作功臣巢父曰國方有虞待子而息悅起謝焉

韓愈憲宗元和末為兵部侍郎會成德軍亂戕其帥田弘

正立裨將王廷湊知節度事朝廷因而命之詔愈往宣撫愈至則諭以逆順利害之理廷湊乃粗識朝旨出牛元翼於重圍及還以其功轉吏部侍郎

胡証為金吾大將軍穆宗長慶二年送太和公主入蕃去迴鶻牙帳尚可汗信宿可汗遣數百騎來請與公主先從他道去証曰不可虜使曰前咸安主來時去花門數百里即先去今何獨拒我証曰我奉天子詔送公主以授可汗今未見可汗豈宜先往虜使乃止

梁劉捍初為太祖副典客兼御史大夫唐光化三年六月太祖北伐鎮定至常山而王鎔色攝送款於太祖命捍入壁門傳諭時兩軍未勦守門者戈戟千匝捍馳騎而入竟達其命移師次中山至懷德驛大破定人五萬衆王處直乞降捍復單馬入州安撫而迴

李振為太祖從事太祖兼領鄆州署天平軍節度副使湖南馬殷為朗州雷蒲所迫振奉命馳往和解殷蒲皆稟命

晉楊彥詢為郝州節度使時鎮州安重榮有不臣之狀

彥詢憂其窺伺會車駕幸鄴表求入覲高祖慮契丹怒

安重榮之殺行人也移兵犯境復命彥詢使焉

臣欽若等曰彥

詢為宣徽使時曾使契丹至是復命之

仍恐重榮要之繇滄州路以入蕃

戎王果怒重榮彥詢具言非高祖本意蓋如人家惡子無如之何尋聞重榮犯闕乃放還

宣國威

夫膺皇華之選以給傳遽之役而能揚君之美延譽於

四方宣國之威折衝於萬里斯可謂不辱命而獲考矣
由漢而下乃有奉辭絕域致使鄰壤或招諭亡叛或鎮
撫危疑震耀於皇靈開示乎大信宣布恩德激昂辭氣
臨大節而無撓抗雄辯而有章繇是殊俗之長稱臣以
奉約恃險之國遣子而入侍還俘掠於邊侯歸職貢於
宰旅厥角聽命改容率禮革其驕驕之心窒夫禍亂之
隙自非懷應變之明畧挺匪躬之雅操蹈難無苟免之
志遇事圖戡濟之績者亦惡能有所立哉

漢陸賈高帝時使南越尉佗因問賈曰我孰與蕭何曹

參韓信賢

與如也

賈曰王似賢也復問曰我孰與皇帝賢

賈曰皇帝起豐沛討暴秦誅彊楚為天下興利除害繼

五帝三王之業統天下理中國之人以億計地方萬里居

天下之膏腴人衆車輿萬物殷富政繇一家自天地剖

判未始有也

言自開闢以來未嘗有也

今王衆不過數萬皆蠻夷崎嶇

山海間譬若漢一郡王何乃比於漢佗大笑曰吾不起

中國故王此使我居中國何遽不若漢

言有何迫促而不如漢也

迺

大說賈

說謂愛悅之

留與飲數月曰越中無足與語至生來

令我日聞所不聞賜賈橐中裝直千金

有底曰橐無底曰橐言其實物

質輕而價重可入囊橐以齎行故曰橐中裝也

它送亦千金

非橐中物故曰它送也它猶餘也

賈卒拜佗為南越王令稱臣奉漢約歸報高帝大悅

傅介子北地義渠人以從軍為官先是龜茲樓蘭皆嘗

殺漢使者

龜茲音丘茲

至昭帝元鳳中介子以駿馬監求使

大宛因詔令責樓蘭龜茲國介子至樓蘭責其王教匈

奴遮殺漢使大兵方至王苟不教匈奴使過至諸國何

為不言王謝服言匈奴使屬過

屬近也近始過去

當至烏孫道

過龜茲介子至龜茲復責其王王亦服罪介子從大宛
還到龜茲龜茲言匈奴使從烏孫還在此介子因率其
吏士共誅斬匈奴使者還奏事詔拜介子為中郎遷平
樂監

後漢來歙為大中大夫時光武方以隴蜀為憂獨謂歙

曰今西州未附子陽稱帝

子陽公孫述子

道里阻遠諸將方務

關東思西州畧未知所任其謀若何歙因自請曰臣嘗

與隗囂相遇長安其人始起以漢為名今陛下聖德隆興臣願得奉威命開以丹青之信囂必束手自歸則述自亡之勢不足圖也光武然之建武三年歙始使隗囂五年復持節送馬援因奉璽書於囂既還復往說囂遣子入侍囂聞劉永彭寵皆以破滅遂遣子恂隨歙入質拜歙為中郎將

班超明帝永平中為奉車都尉竇固假司馬使鄯善斬匈奴使還奉於固固大喜具上超功效并求更選使使

西域帝壯超節詔固曰吏如班超何故不遣而更選乎
今以超為軍司馬令遂前功超復受使固欲益其兵超
曰願將本所從三十餘人足矣如有不虞多益為累是
時于寘王廣德新攻破莎車遂雄張南道而匈奴遣使
監護其國超既西先至于寘廣德禮意甚踈且其俗信
巫巫言神怒何故欲向漢漢使有騮馬騮一作驪急求
取以祠我廣德乃遣使就超請馬超密知其狀報許之
而令巫自來取馬有頃巫至超即斬其首以送廣德因

馬淺黑色

辭讓之廣德素聞超在鄯善誅滅虜使大惶恐即攻殺
匈奴使者而降超超重賜其王以下因鎮撫焉

梁諷和帝永元元年為車騎將軍竇憲軍司馬憲出征
匈奴令諷先齎金帛使北單于宣國威德其歸附者萬
餘人

魏牽招安平觀津人初事袁紹為督軍從事兼領烏丸
突騎後歸太祖太祖領冀州辟為從事太祖將討袁譚
而柳城烏丸欲出騎助譚太祖以招嘗領烏丸遣詣柳

城到值峭王巖以五千騎當遣詣譚又遼東太守公孫
康自稱平州牧遣使韓忠齋單于印綬往假峭王峭王
大會羣長忠亦在坐峭王問招昔袁公言受天子之命
假為單于今曹公復言當更白天子假我真單于遼東
復持印綬來如此誰當為正招荅曰昔袁公承制得有
所拜假中間違錯天子命曹公代之言當白天子更假
真單于是也遼東下郡何得擅稱拜假也忠曰我遼東
在滄海之東擁兵百萬又有扶餘濊貊之用當今之勢

彊者為右曹操獨何得為是也招呵忠曰曹公允恭明
哲翼戴天子伐叛柔服寧靜四海汝君臣頑翬今恃險
遠背違王命欲擅拜假侮弄神器方當屠戮何敢慢易
咎毀大人便捉忠頭頓築拔刀欲斬之峭王驚怖徒跣
抱招以救請忠左右失色招乃還坐為峭王等說成敗
之效禍福所歸皆下席跪伏敬受勅教便辭遼東之使
罷所嚴騎太祖滅譚於南皮署招軍謀掾

南齊蕭惠基初仕宋為撫軍車騎主簿泰始初兄益州

刺史惠開拒命明帝遣惠基奉使至蜀宣旨開降而益州士反引氏賊圍州城惠基於外宣示朝廷威賞於是氏人邵虎郝天錫等斬賊帥馬興懷以降

後魏燕鳳初為道武代王左長史參國事嘗使前秦苻堅堅問鳳曰代王何如人也對曰寬和仁愛經畧高遠一時雄主也常有吞天下之志堅曰卿輩北人無剛甲利器敵弱則進敵彊則退安得兼并也鳳曰北人悍勇上馬持三杖驅使若飛主人雄雋率服北土控弦百萬

號令若一軍糧輜重樵爨自若輕行速捷因敵取資此南方所以疲弊北方所以常勝堅曰彼國人馬多少鳳曰控弦之士數十萬見馬百萬匹堅曰卿言人衆則可說馬太多鳳曰雲中川從東山西河二百餘里北至南山百餘里每歲孟秋馬常大集畧為蒲川以此推之使人言猶未盡堅厚贈之

李順太武時為四部尚書使於北涼沮渠蒙遜蒙遜將不拜順責之乃下拜及禮畢蒙遜曰夫恃德者昌恃力

者亡朝廷頃來征伐屢克境宇已博但當修理此民亦足興治然專務討擊恐不可常勝順曰昔太祖廓定洪基造有區夏太宗承統王業惟新自聖上臨御志寧四海是以戎車屢駕親冒風霜滅赫連於三秦走蠕蠕於漠北闢土開邊隸首不紀僵屍截馘所在成觀首除暴虐安黎庶威震八荒聲被九域自古以來用兵之美未有爾日之盛是以遐方荒俗之氓莫不翹足抗手歛衽屈膝天兵四臨昭德罰罪何云恃力夫聖王之用兵也

征南蠻則北狄怨討西戎則東夷恨天子安得已哉蒙
遜曰誠如來言則涼土之民亦願魏帝遠至何為復遽
驛告警不舍晝夜意君之所言殆為虛事順曰苗民叛
帝舜而親暴君有扈違后啟而從逆主咸懾逼於近地
牽制於凶威自古而然豈獨涼民也哉

公孫軌為大鴻臚持節拜氏王楊玄為南秦王軌及境
玄不郊迎軌數玄曰昔尉佗跨據及陸賈至匍匐奉順
故能垂名竹帛今君王無肅恭之禮非蕃臣也玄使其

屬趙客子對曰夫以六合為家孰非王庭是以敢請入國然後受謁軌答曰大夫入境尚有郊勞而况王命者乎請奉策以還玄懼詣郊受命軌使還稱旨拜尚書賜爵燕郡公

封軌孝文太和中為儀曹郎中使高麗高麗王雲恃其偏遠稱疾不親受詔軌正色詰之諭以大義雲乃北面受詔先是契丹虜掠邊民六十餘口又為高麗擁掠東歸軌具聞其狀移書徵之雲悉資給遣還

北齊斛律羌舉為夏州刺史高祖欲招懷遠夷令羌舉使於阿至羅宣揚威德前後稱旨甚被嘉賞

隋虞慶則為尚書僕射時突厥之種沙鉢略遣使詣闕高祖遣慶則與長孫晟報書沙鉢略陳兵列其實物坐見慶則稱病不能起且曰我父伯以來不向人拜慶則責而諭之千金公主私謂慶則曰可汗豹狼性過與爭將入時長孫晟說諭之沙鉢略辭屈乃頓顙跪受璽書以戴於首既而大慙其羣下因相聚慟哭慶則又遣稱

臣沙鉢畧謂其屬曰何名謂臣報曰隋國稱臣猶此稱
奴耳沙鉢畧曰得作大隋天子奴虞僕射之力也贈慶
則馬千匹并以從妹妻之

長孫晟開皇四年為奉車都督副尚書右僕射虞慶則
使突厥攝圖賜宇文公主姓為楊氏千金公主

公主後周趙王

昭女自請改姓乞為帝女改封大義公主攝圖奉詔不肯起拜晟進

曰突厥與隋俱是大國天子可汗不起安敢違意但可
賀敦為帝女則可汗是大隋女婿奈何無禮不敬婦公

乎攝圖乃笑謂其達官曰須拜婦公我從之耳於是乃拜詔書使還稱旨授儀同三司大業三年煬帝幸榆林欲出塞外陳兵耀武經突厥中抵于涿郡仍恐染干驚懼先遣晟往諭旨稱述帝意染干聽之因召所部諸國奚靺鞨室韋等種落數十酋長咸萃晟見牙中草穢欲令染干親自除之示諸部落以明威重乃指帳前草曰此根大香染干遽笑之曰殊不香也晟曰天子行幸所在諸侯躬親灑掃耘除街路以表至敬之心今牙中蕪穢

謂是留香草耳染干乃悟曰奴罪過奴之骨肉皆天子賜也得効筋力豈敢有辭特以邊人不知法耳賴將軍恩澤而教導之將軍之惠奴之幸也遂拔所佩刀親自芟草其貴人及諸部爭做効之乃發榆林北境至于其牙又東達于薊長三千里廣百步舉國就役而開御道帝聞晟策乃益嘉焉

崔君肅為司朝謁者大業初處羅可汗為鐵勒所敗時黃門侍郎裴矩在燉煌引致西域聞國亂復知處羅思

其母氏因奏之煬帝遣君肅齎書慰諭之處羅甚踞受詔不肯起君肅謂處羅曰突厥本一國也中分為二自相仇敵每歲交兵積數十年而莫能相滅者明知啟民與處羅國其勢敵耳今啟民舉其部落兵且百萬入臣天子甚有丹誠者何也但以切恨可汗而不能獨制故卑事天子以借漢兵連二大國欲滅可汗耳百官兆庶咸請許之天子弗違師出有日矣顧可汗母向氏本中國人歸在京師處于賓館聞天子之詔懼可汗之滅旦

夕守闕哭泣悲哀是以天子憐焉為其輟策向夫人又
匍匐謝罪因請發使以召可汗令入內屬乞加恩禮同
於啟民天子從之故遣使到此可汗若稱藩拜詔國乃
永安而母得延壽不然者則向夫人為誑天子必當所
戮而傳首虜庭發大隋之兵資北藩之衆左提右挈以
擊可汗死亡則無日矣奈何惜兩拜之禮勸慈母之命
恠一句稱臣喪匈奴之國也處羅聞之矍然而起流涕
再拜跪受詔書君肅又說處羅曰啟民內附先帝嘉之

賞賜極厚故致兵彊國富今可汗後附與之爭寵湏深
結於天子自表至誠既以道遠未得朝覲宜立一功以
明臣節處羅曰如何君肅曰吐谷渾者啟民少子莫賀
咄設之母家也今天子又以義成公主妻於啟民啟民
畏天子之威而與之絕吐谷渾亦日憾漢故職貢不修
可汗若請誅之天子必許漢擊其內可汗攻其外破之
必矣然後身自入朝道路無阻因見老母不亦可乎處
羅大喜遂遣使朝貢

唐鮮于叔明肅宗乾元中為司勳員外郎副漢中王瑀使迴紇迴紇接禮稍倨叔明離位責之曰大國通好賢王奉使可汗大唐子壻豈可恃微功而傲乎唐法則不然可汗改容加敬復命遷司門郎中

韋倫德宗建中初為太常少卿使吐蕃初宣諭皇恩次述國家威德遠振蕃人悅之贊普大獻琛賫等倫還遷太常卿

溫造穆宗長慶元年授京兆府司錄穆宗開延英召對

詔曰幽州用舊事不變藉卿為我行焉對曰臣府縣吏
非宜行恐四方狹朝廷為無人帝曰我在東宮時聞劉
總請覲及我即位比年上書不絕及訪行期即瘖默不
報卿往諭我意是日賜緋魚袋充太原鎮州幽州宣諭
使初至范陽劉總具橐鞬立於外郊造入宣聖旨示以
禍福總喘伏流汗若兵在頸矣及造歸奏不數日總全
家出幽州拜殿中侍御史

後唐李嚴為容省使同光初僞蜀王衍使人致書其詞

甚抗莊宗遣報聘且市宮中珍玩蜀人皆禁而不予
衍冲弱無識軍國之事外則仗王宗弼內委宋光嗣景
潤澄及嚴至光嗣等曲宴府第因問近事嚴曰吾皇即
位鄴宮之歲夏取汶陽冬誅汴襲宋氏兵號三十萬謀
臣猛將解甲倒戈西盡甘涼東漸渤海南踰閩浙北極
幽陵牧伯侯王稱藩不暇家財入貢府實上供吳主有
唐舊臣岐王先朝元老皆遣子入侍述職稱臣湖湘荆
楚抗越甌閩異貨竒珍府無虛冒也諒繇以德懷來

以威歎伏順則涵之以恩澤迷則問之以干戈四海車
書大同非晚宋光嗣曰荆楚則僕所未知唯岐下宋公
我之姻好洞見其心反覆多端專欲踞人於鑪炭大國
不足信也似聞契丹之族近日強盛大國得無備乎嚴
曰公以為彼之勝負孰若偽梁曰比梁為劣嚴曰吾皇
之視北敵如蚤虱耳以其為患不足把搔况良將勁兵
布列天下彼不勞一郡之兵一校之力則懸首橐街盡
為我獲但以天生四夷終非大患不欲窮兵黷武故也

光嗣聞嚴辨對畏而竒之

嚴奉使於蜀及與王衍相見陳使者之禮因於笏記中具

述莊宗興復之功其警句云纔過泣水縛王彥章於馬前旋及夷門斬朱友真於樓上嚴復聲韻清亮蜀人聽

之愕然

册府元龜卷六百五十二

欽定四庫全書

冊府元龜卷六百五十三 宋 王欽若等 撰

奉使部

稱旨

仲尼曰使於四方不辱君命可謂士矣蓋夫有專對之才加之以敏應機罔滯遇事立斷足以成務始可與權然後出疆則有華復命則有勞斯古人以為使乎之難者矣至于馳一介之行李合二國之歡心俾隣境益恭

獷俗向化得紆難之畧啟和戎之利乃有奉將清詔循
行庶邦宣慰有方便宜從事巡察風俗舉劾貪猾以應
對而知賞繇懷輯而見稱以至跋扈之人能令其順命
疑貳之俗終俾其歸心斯皆使者之任也是故明君之
使臣也以事而不制以辭故能俾其成命而獲考者也
漢隨何為謁者時漢王與楚大戰彭城不利謂左右曰
彼等皆無足與計天下事者何進曰不審陛下所謂漢
王曰孰能為我使淮南使之發兵向楚

淮南英布也

我之取

天下可以萬全何曰臣請為使之乃與二十人俱至淮南布間行與何俱歸漢

陸賈初以客從高祖時尉佗平南越因王之高祖使賈賜佗印為南越王佗大說稱臣奉漢約歸報高帝大說文帝即位欲使人之南越丞相陳平乃言賈往使尉佗去黃屋稱制

黃屋謂車上之蓋也黃屋及稱制皆天子之儀故令去之者

今比諸侯

皆如意指

嚴助為中大夫時閩越圍東甌告急武帝曰吾新即位

不欲出虎符發兵郡國廼遣助以節發兵會稽會稽守

欲距法不為發

以法距為無符驗也

助廼斬一司馬諭意指

以天子意

指曉告之遂發兵浮海救東甌未至閩越引兵罷

終軍為謁者使行郡國所見便宜以聞還奏事帝甚悅

司馬相如字長卿武帝時唐蒙已畧通夜郎因通西南

夷道發巴蜀廣漢卒作者數萬人治道二歲不成士卒

多物故

物故死也

費以億萬計蜀民及漢用事者多言不便

是時邛笮之君長

邛者今為邛都縣笮者今為定笮縣

聞南夷與漢通得

賞賜多欲願為內臣妾請吏比南夷帝問相如相如曰

印笮冉駹者近蜀道易通

今夔州開州府等首領姓冉者皆舊冉種也駹音龍

異

時嘗通為郡縣矣

異時猶言往時也

至漢興而罷通今誠復通

為置縣愈於西南夷

南夷謂犍為牂牁也西夷謂越巂益州也

帝以為然乃拜

相如為中郎將建節往使副使者王然于壺充國呂越

人馳四乘之傳

張應切

因巴蜀吏幣物以賂南夷相如使

畧定西南夷印笮冉駹斯榆之君皆請為臣妾除邊關

邊關益斥西至沫若水

沫水出蜀廣平徼若水出就牛徼外沫音妹

南至牂

牂為徼

徼以木石水謂為界者也斯榆之君等自求去邊關欲與牂牁作徼舉也工鈞切

通靈

山道橋孫水

鑿開靈山道置靈道縣孫水出臺登縣南至會無入若水於孫水上作橋

以通

印笮還報天子大說

說讀曰悅

蓋寬饒為大中大夫行風俗多所稱舉貶黜奉使稱意
孔光為博士成帝初奉使錄冤獄行風俗振贍流民奉
使稱意由是知名

陳咸為刺史冀州奉使稱意

平當為博士給事中使行流民幽州舉奏刺史二千石

勞徠有意者言渤海鹽池可且勿禁以救民急

恣民者
鹽官不

專也所過見稱即奉使者十一人為最

樓護字君卿齊人也平阿侯王譚舉護方正為諫議大

夫使郡國護假貸

言以假物貧
人令護監之

使還奏事稱意

後漢李恂章帝時為侍御史持節使幽州宣布恩澤慰

撫北狄所過皆圖寫山川屯田聚落百餘卷悉封奏上

帝嘉之

雷義以順帝時守灌謁者

漢官儀曰謁者三十五人以
郎中秩滿歲稱給事未滿歲

稱灌
謁者

使持節督郡國行風俗太守令長坐者凡七十人

周舉為諫議大夫永和六年詔遣八使巡行風俗舉於是劾奏貪猾表薦公清朝廷稱之

范滂桓帝時舉孝廉光祿四行

光祿舉敦厚質樸遜讓節儉此為四行也

冀州饑荒盜賊羣起乃以滂為清詔使案察之滂登車攬轡慨然有澄清天下之志及至州境守令自知贓污望風解印綬去其所舉奏莫不厭塞衆議

第五種以司徒掾清詔使冀州廉察災害

風俗通曰汝南周勃辟太

尉清詔使荊州又此言以司徒清詔使舉奏刺史二千
冀州蓋三公府有清詔員以承認使也

石以下所刑免甚衆弃官奔走者數十人奉使稱職

蜀孫乾字公祐北海人也先主領徐州辟為從事後隨
從周旋先主之背曹公遣乾自結袁紹將適荊州乾又
與糜竺俱使劉表皆如意指

馬良為侍中時東征吳遣良入武陵招納五溪蠻夷渠
帥皆受印號咸如意指

鄧芝為尚書先主薨於永安先是吳王孫權請和先主

累遣宋瑋費禕等與相報答丞相諸葛亮深慮權聞先
主殂隕恐有異計未知所如芝見亮曰今主上幼弱初
在位宜遣大使重申吳好亮答之曰吾思之久矣未得
其人耳今日始得之芝問其人為誰亮曰即使君也乃
遣芝修好於權權果狐疑不時見芝芝乃自表請見權
曰臣今來亦欲為吳非但為蜀也權乃見之語芝曰狐
誠願與蜀和親然恐蜀主幼弱國小勢偏為魏所乘不
自保全以此猶豫耳芝對曰吳蜀二國四州之地大王

命世之英諸葛亮亦一時之傑也蜀有重險之固吳有
三江之阻合此二長共為唇齒進可并兼天下退可鼎
足而立此理之自然也大王今若委質於魏魏必上望
大王之入朝下求太子之內侍若不從命則奉辭伐叛
蜀必順流見可而進如此江南之地非復大王之有也
權默然良久曰君言是也遂自絕魏與蜀連和遣張溫
報聘於蜀權與亮書曰丁宏揆張

漢書禮樂志曰長離
前揆光耀明孫權蓋

以丁宏之言多浮
豐也揆音夷念反陰化不盡和合二國唯有鄧芝

李福字孫德梓潼涪人也為尚書僕射諸葛亮於武功病篤後主遣福省侍遂因諮以國家大計福往具宣聖旨聽亮所言至別數日忽思未盡其意遂却騎馳還見亮亮語福曰孤知君還意近日言語雖彌日有所不盡更求一決耳君所問者公琰其宜也

蔣琬字公琰

福謝前實

失不諮請公如公百年後誰可任大事者故輒還耳乞

復請蔣琬琬後誰可任者亮曰文偉

費禕字文偉

可以繼之

又復問其次亮不答福還奉使稱旨

費禕為昭信校尉使吳還遷為侍中諸葛亮北住漢中請禕為叅軍以奉使稱旨頻至吳

羅憲字令則以宣信校尉再使於吳吳人稱美焉

吳是儀為侍中時蜀相諸葛亮卒大帝垂心西州遣儀使蜀申固盟好奉使稱意

晉侯史為侍中與皇甫陶荀廙持節循省風俗及還奏事稱旨

宋裴松之為國子博士文帝元嘉三年誅徐羨之等分

遣大使巡天下松之出使湘州反使奏曰天道以下濟
光明君德以廣運為極古先哲后因心溥被是以文思
在躬則時雍自洽禮行江漢而美化斯遠故垂大武之
休詠廓造周之盛則伏惟陛下神叡玄通道契曠代冕
旒華堂垂心八表咨敬敷之未純慮明揚之靡暢清問
下民哀此鰥寡渙焉大號周爰四達遠猷形於雅誥惠
訓播乎遐陬是故率土仰詠重譯咸悅莫不謳吟踊躍
式欽皇風或有扶老携幼稱歡路左誠繇亭毒既流故

忘其自千載一時於是乎在臣謬蒙銓任忝廁顯列猥以短乏思循八表無以宣暢聖旨肅明風化黜陟無序搜揚寡聞慙懼屏營不知所措奉二十四條謹隨事為牒伏見癸卯詔書禮俗得失一依周典每各為書還具條奏謹依事為書以繫之松之甚得奉使之意論者美之

劉勔為劉道錫揚烈府主簿元嘉二十七年後魏南侵道錫遣勔使詣京都太祖引見之酬對稱旨

南齊劉係宗為寧朔將軍白賊唐寓之起宿衛兵東討
遣係宗隨軍慰勞遍至遭賊郡縣百姓被驅逼者悉無
所問還復民伍係宗還武帝曰此役有征無戰以時平
蕩百姓安帖甚快也

陳蕭乾為黃門侍郎時熊曇朗在豫章周迪在臨川留
異在東陽陳寶應在建晉共相連結閩中豪帥立砦自
保武帝患之令乾往諭以逆順謂曰昔陸賈南征趙佗
歸順隨何奉使黥布來臣追想清風髣髴在目卿宜勉

建功名不煩更勞師旅乾至示以逆順所在款附

毛喜初與宣帝事梁元帝為尚書勸論侍郎及江陵陷喜及宣帝俱遷關右世祖即位喜自周還進和好之策朝廷乃遣周弘正等通聘宣帝反國喜於郢州奉迎又遣喜入關以家屬為請周冢宰宇文護執喜手曰能結二國之好者卿也

蕭引為吏部侍郎時廣州刺史馬靖甚得嶺表人心而兵甲精練每年深入俚洞又數有戰功朝野頗生異議

宣帝以引悉諳嶺外物情且遣引觀靖審其舉措諷令
送質引奉密旨南行外託收督賸物既至番禺靖即悟
旨盡遣兒弟下都為質

後魏崔玄伯道武時為周兵將軍時詔遣使者巡行郡
國糾察守宰不如法者令玄伯與宜都公穆觀等案之
明元稱其平當

公孫表字玄元初為慕容冲尚書郎歸朝使江南稱旨
庾岳道武時為外朝大人參預軍國帝既絕慕容垂以

岳為大人使詣慕容永永服其詞義

張濟為散騎侍郎時後秦姚興遣將攻洛陽晉雍州刺史楊佺期遣使乞師於常山王遵遵以狀聞道武遣濟為遵從事中郎報之濟自襄陽還帝問濟江南之事濟對曰司馬昌明死子德宗代立所部州鎮迭相攻擊今雖小定君弱臣強全無綱紀臣等既至襄陽佺期問臣魏初伐中山幾十萬衆臣答四十餘萬佺期曰魏國被甲戎馬可有幾匹臣答中軍精騎十有餘萬外軍無數

佺期曰以此討羌豈足滅也又曰魏定中山徙幾戶於此臣答七萬餘家佺期曰治在何城臣答定都平城佺期曰有如許大衆亦何用城為又曰魏帝為欲久都平城將復遷乎臣答非所知也佺期聞朝廷不都山東貌有喜色曰晉魏通和乃在往昔非唯今日羌寇狡猾頻侵河雒夙夜憂危今此寡弱倉庫空竭與君便為一家義無所諱雒城救援仰待於魏若獲保全當必厚報如其為羌所乘寧使魏取臣等欲分向揚州佺期曰蠻賊

互起水行甚難魏之軍馬已據滑臺於此而還從北道
東下乃更便宜且晉之法制有異於魏今都督襄陽委
以外事有欲征討輒使興發然後表聞令朝廷知之而
已如其事勢不舉亦不承臺命帝嘉其詞順乃厚賞其
使許救雒陽後遷謁者僕射報使姚興以累使稱旨
張彛為散騎常侍兼侍中彛善於督察每東西馳使有
所巡檢彛嘗充其選清慎嚴猛所至人皆畏伏儔類亦
以此高之

古弼明元時為獵郎使長安稱旨

李順允使涼州沮渠蒙遜十有二返太武稱其能

高推字仲讓早有名譽大延中以前後南使不稱妙簡
行人中書博士游雅薦推應選詔兼散騎常侍使宋南
人稱其才辯

元庫汗明於斷決獻文即位拜殿中給事每奉使察行
州鎮折獄以情所歷皆稱之秦州父老詣闕乞庫汗為
刺史前後千餘人朝廷許之未及遣遇病卒

鄧羨為黃門侍郎時幽瀛滄冀大水頻經寇難民饑詔羨兼尚書假散騎常侍持節諸州隨方賑恤多有所濟游肇為散騎侍郎兼侍中為畿內大使黜陟善惡賞罰分明

襲恒山王暉少沉敏頗涉文史宣武即位拜尚書主客郎巡省風俗還奏事稱旨

陰道方為李神儁所知賞神儁為前將軍荊州刺史請道方為其府長流參軍神儁曾使道方詣梁雍州刺史

蕭綱論邊事道方風神沉正為綱所稱

李崇孝明時為使持節兼侍中東道大使黜陟能否著
賞罰之稱

劉隲字子昇彭城人弱冠州辟主簿齊獻武王時奉使
詣闕見莊帝於顯陽殿問以邊事隲應對閑敏帝善之
元孚從出帝入關為司空時蠕蠕主與孚相識先請見
孚然後遣女於是乃使孚行蠕蠕君臣見孚莫不歡悅
奉皇后求歸

北齊宋世良初仕魏為殿中侍御史詣河北括戶大獲
浮情還見汲郡城旁多骸骨移書州郡令悉收瘞其夜
甘雨滂沱還孝莊勞之曰知卿所括得丁倍於本帳若
官人皆如此用心便是更出一天下也

斛律羌舉為東夏州刺史時高祖欲招懷遠夷令羌舉
使於阿至羅宣揚威德前後稱旨甚被知賞

張纂為右光祿大夫使於茹茹以銜命稱旨

李稚廉兼散騎常侍省方大使行還所奏多見納用

後周趙剛初為魏閣內都督時賀拔勝獨孤信以孝武西遷之後並流寓江左至是剛言於魏文帝請遣而復之乃以剛為兼給事黃門侍郎使梁魏興齋移書與其梁州刺史杜懷珪等即與盟軟受移建康仍遣人隨剛報命是年又詔剛使三荆聽在所便宜行事使還稱旨進爵武城縣侯除大丞相府帳內都督復使魏興重申前命尋而梁人禮送賀拔勝獨孤信等

宇文測初仕魏為司徒右長史李武疑齊神武有異圖

詔測詣太祖言令密為之備太祖見之甚懼

庠狄峙初為魏黃門侍郎時與東魏爭衡蠕蠕乘虛屢為邊患朝議欲和親乃使峙往峙狀貌魁梧善於辭令蠕蠕主雅信結重之自是不復為寇文帝謂峙曰昔魏絳和戎見稱前史以君方之彼有愧色

楊柲為撫軍將軍銀青光祿大夫時東魏遷鄴太祖欲知其所為乃遣柲間行詣鄴以觀察之使還稱旨

杜杲為司倉上士初陳文帝弟安成王頊為質於梁及

江陵平頊隨例遷長安陳人請之太祖許而未遣至是
帝欲歸之命杲使焉陳文帝大悅即遣使報聘并賂黔
中數州之地仍請畫野分疆永敦隣好以杲奉使稱旨
進授都督治小御伯更徃分界焉

劉雄為駕部中大夫兼齊公憲府掾時齊相斛律明月
率衆築通闕城以援宜陽先是國家與齊通好約言各
保境息民不相侵擾至是憲以齊人失信令雄使於明
月責其背約雄辭議辨直齊人憚焉

楊薦孝閔帝初為御伯大夫使突厥結婚突厥可汗弟地頭可汗阿史那庫頭居東面與齊通和說其兄欲背先約計謀已定將以薦等送齊薦知其意乃正色責之詞氣慷慨涕泗橫流可汗慘然良久曰幸無所疑當共平東賊然後發遣我女乃令薦先報命仍請東討以奉使稱旨遷大將軍

竇毅為大將軍時與齊人爭衡戎車歲動並交結突厥以為外援在太祖之時突厥已許納女於我齊人亦甘

言重幣遣使求婚狄固貪憚便欲有悔朝廷乃令揚薦等累使結之往反十餘方復前好至是雖期往逆猶懼改圖以毅地無勲戚素有威重乃命為使及毅之至齊使亦在焉突厥君臣猶有二志毅抗言正色以大義責之累旬乃定卒以皇后歸朝議嘉之

王慶為中將軍武帝保定二年使吐谷渾與其分疆仍論和好之事渾主悅服遣所親隨慶獻貢初突厥與周和親許納女為后而齊人知之懼成合從之勢亦遣使

求婚財饋甚厚突厥貪其重賂便許之朝議以魏氏昔
與蠕蠕結婚遂為齊人離貳今者復恐改變欲遣使結
之遂授慶左武伯副揚薦為使是歲遂興入并之役慶
乃引突厥騎與隋公楊忠至太原而還及齊人許送皇
姑及世母朝廷遂與通和突厥聞之復致疑阻於是又
遣慶往喻之可汗感悅結好如初五年復與宇文貴使
突厥逆女自此以慶信著北藩頻歲出使後更至突厥
屬其可汗暴殂突厥謂慶曰前後使來逢我國喪者皆

務面表哀况今二國和親豈得不行此事慶抗辭不從
突厥見其守正卒不敢逼武帝聞而嘉之

陸逞為軍司馬武帝天和三年齊遣侍中斛斯文略中
書侍郎劉逖來聘初修隣好盛選行人詔逞為使尹公
正為副以報之逞美容止善詞令敏而有禮齊人稱焉
隋元暉初仕周為武伯下大夫時突厥屢為寇患朝廷
將結和親令暉齎錦綵十萬使於突厥暉說以利害申
國厚禮可汗大悅遣其王隨獻方物武帝之聘突厥后

也令暉致禮焉

韋冲字世冲初仕後周從大將軍元定渡江伐陳為陳人所虜武帝以幣贖而還之帝復令冲以馬千匹使於陳以贖開府賀拔華等五十人及元定之柩西還冲有辭辯奉使稱旨

蘇孝慈仕周為中侍上士後拜都督聘於齊稱旨

長孫晟初仕周為司衛上士宣帝時突厥攝圖請婚於周以趙王招女妻之然周與攝圖各相誇競妙選驍勇

使者以充因遣晟副汝南公宇文慶送千金公主至於其牙前後使人數十輩攝圖多不禮見晟而獨愛焉每共游獵留之竟歲嘗有二鵬飛而爭肉因以兩箭與晟曰請射取之晟乃彎弓馳往遇鵬相攫遂一發而雙貫焉攝圖喜命諸子弟貴人皆親友冀昵近之以學彈射其弟處羅侯號突利設尤得衆心而為攝圖所忌密託心腹陰與晟盟晟與之游因察山川形勢部衆強弱皆盡知之時高祖作相晟以狀白高祖高祖大喜

賀若誼初仕周為直門將軍時茹茹種落携貳齊遣其舍人楊暢結好於茹茹太祖恐其并力為邊境之患使誼聘茹茹誼因啗以厚利茹茹因信之遂與周連和執暢付誼太祖嘉之

韋師為河北道行臺兵部尚書詔於山東河南十八州安撫大使奏事稱旨

長孫平高祖時為工部尚書時突厥達頭可汗與都藍可汗相攻各遣使請援帝使平持節宣諭令其和解賜

縑三百疋良馬一匹而遣之平至突厥所為陳利害遂
各解兵

柳謩之為光祿少卿時啟民可汗自以內附遂畜牧於
定襄馬邑間帝使謩之諭令出塞及還奏事稱旨

皇甫誕為持書侍御史高祖以百姓多流亡令誕為河
南道大使以簡括之及還奏事稱旨帝甚悅

房彥謙為監察御史以陳平奉詔安撫泉括等十州銜
命稱旨

盧昌衡為金州刺史奉詔持節為河南道巡省大使及還稱旨

許善心為禮部侍郎煬帝大業元年副納言楊達為冀州道大使還奏稱旨

唐劉文靜為晉陽司馬高祖初興義兵於晉陽遣文靜使突厥始畢始畢曰唐公舉義欲何為也文靜曰文皇帝廢冢嫡傳位後主致斯禍亂唐公國之懿戚不忍坐觀成敗欲廢不當立者願與可汗兵馬同入京師人衆

土地入唐公財帛金寶入突厥始畢大悅即遣將康鞘利領騎二千而又獻馬千匹高祖大悅

襄武郡公琛與太常卿鄭元璠齋女妓遺突厥始畢可汗以結和親始畢甚重之贈名馬數百匹遣骨吐祿特勤隨琛貢方物高祖大悅

皇甫無逸武德初為御史大夫時益部新開政刑未洽長使橫恣賊汚狼籍令無逸持節巡撫無逸宣揚朝化法令嚴肅蜀中甚賴之

豆盧寬太宗貞觀中為殿中監使於突厥寬容儀閑雅
詞旨可觀突厥甚敬憚焉

崔敦禮以貞觀二十年為兵部尚書兼簡校鴻臚卿瀚
海都督迴紇吐迷度為其下所殺詔敦禮持節綏輯之
因立其嗣敦禮深識蕃情凡所奏請事多允會

鄭維忠中宗時為御史大夫持節賑給河北道仍黜陟
牧宰還敷奏稱旨

李傑神龍初為衛尉少卿為河東道巡察黜陟使奏課

為諸使之最

宇文融玄宗開元初為兵部員外郎括逃戶所至揚宣恩命百姓感其言至有流淚稱為父母者

李暉為工部尚書東都留守開元二十一年正月制曰繼好之義雖屬邊鄙受命以出必在親賢事欲重於當時禮故崇於殊俗選衆之舉無出宗英工部尚書李暉體含柔嘉識致明允為公族之領袖是朝廷之羽儀金城公主既在蕃中漢庭公卿非無專對有懷於遠夫豈

能忘宜持節充入吐蕃使准式發遣以國信物一萬疋
私覲物二千匹皆雜以五綵遣之及還金城公主上言
請以今年九月一日樹碑於赤嶺定蕃漢界樹碑之日
詔張守珪李行禕與吐蕃使莽布支同往觀焉既而吐
蕃遣其臣隨漢使分往劍南及河西磧西歷告邊州曰
兩國和好無相侵掠漢使告亦如之嵩奉使稱旨

王縉肅宗時為兵部侍郎屬平史朝義河朔未安詔縉
以本官河北宣慰奉使稱旨

賀若察代宗大厯四年為給事中察自潁州使還見於
延英殿賜帛五十疋先是潁州刺史李岵以暴政專殺
本道使令狐彰陳奏帝命宣慰且驗其事察復奏稱旨
與彰狀協流岵於夷州

吳湊為金吾將軍時滑亳節度令狐彰汴宋節度田神
功等亡於鎮軍州頗騷擾湊皆承詔宣勞慰撫事多適
宜

班宏為結事中時成德軍李寶臣卒其子惟岳匿父喪

以求位代宗難之乃遣宏問疾且喻惟岳惟岳厚賂之
宏皆不受還報合旨

歸崇敬德宗時為左散騎常侍時兩河叛渙之徒初稟
朝命令崇敬以本官兼御史大夫持節宣慰奉使稱旨
李紆為兵部侍郎時誅李懷光諸軍兵會河中詔紆宣
慰以勵節將還報合旨

樊澤為都官員外郎建中初為克和蕃使蕃中用事宰
相尚結贊深禮之尋從鳳翔節度張鎰與吐蕃會盟於

清水

盧羣為兵部員外郎使淮西節度吳少誠奉使稱旨

于頔以櫟陽主簿攝監察御史充入蕃使判官後為司
門員外郎兼侍御史充西蕃計會使將命稱旨時論以
為有出疆專對之能

溫造字簡輿張建封收壽春招以尺書造從之及建封
按察彭門造歸下邳時李希烈用蔡兵四劫所至陷沒
天下城鎮恃兵者皆欲動搖或自立帥請節德宗患之

以范陽劉濟方推忠誠但不能盡達朝廷倚賴之意乃
密詔建封選賢德有識之士往喻之建封乃強署造節
度參謀使於幽州造與語未訖濟俯伏流涕曰濟僻在
遐裔不知天子神聖大臣忠蓋願得率先諸侯效以死
節造還建封以其名上聞乃馳驛入奏長慶元年授京
兆府司錄參軍奉使河朔稱旨遷殿中侍御史既而幽
州劉總請以所部九州聽朝旨穆宗選可使者或薦造
帝召而謂之曰朕以劉總輸忠雖以書詔便蕃未盡朕

之深意以卿素能辦事為朕此行造對曰臣府縣走吏
初受憲職望輕事重恐辱國命無能諭旨帝曰我在東
宮時聞劉總請覲及我即位比年上書不絕及約以行
期即瘖默不報卿識機知變往諭我懷無多讓也乃拜
起居舍人賜緋魚袋充太原鎮州幽州宣諭使造初至
范陽劉總具橐鞬郊迎及宣聖旨示以禍福總俯伏流
汗若兵加於頸矣及造使還總遂移家入覲朝廷遂以
張弘靖代之及朱克融逐弘靖成德殺田弘正朝廷用

兵乃先令造銜命河東魏博澤潞橫海深冀易定等道
諭以軍期事皆稱旨

李鄴為吏部員外郎徐州張建封卒其子愔為將校所
迫俾領軍務詔擇臨難不懾者即其軍以諭之遂命鄴
為宣慰使鄴直抵其軍召將士傳朝旨陳禍福脫監軍
桎梏令復其位兇黨不敢犯及愔上表稱兵馬留後鄴
以為非詔令所加不宜自號使削去乃受

爰陟貞元中為左司郎中累奉使皆稱旨

袁滋為祠部郎中兼御史中丞充冊南詔使及還以清平官尹輔首來朝又得先沒蕃將衛景升韓演等三人並南詔所獲吐蕃將帥俘囚百人至京南詔異牟尋上表陳謝冊命及頒賜正朔仍請擊吐蕃兼獻方物

房式憲宗時為吏部郎中時河朔節度劉濟王士貞張茂昭皆以兵壯氣豪相持短長屢以表聞迭請加罪帝欲止其兵李吉甫薦式為給事中將命於河朔式歷使諸鎮諷諭之還奏愜旨

崔從為尚書左丞元和十三年王承宗再奉朝貢表遣
二子入侍請納德棣二州詔從宣撫且受地議者以承
宗誠詐未可知又入侍者非承宗子人皆憂之從次魏
州田弘正以路師道境欲以五百騎送之從不聽以童
僕十數騎徑至成德先令大集軍士於毬場宣諭恩敕
詞旨慷慨衆心感動承宗與軍士皆號泣俯拜及饗宴
每從容與承宗諭以大節承宗為禮益恭及還遂按二
郡之籍收其戶口兵儲以復命帝臨軒勞悅久之

鄭權為右散騎常侍穆宗長慶二年三月自迴鶻告哀
回帝初即位欲重其使以權嘗歷顯位器質魁偉有詞
辯可以將命故選任之權憚遠役辭以宿有廢痼之疾
不能馳馬既不免乃肩輿涉磧至虜庭詞氣不撓頗得
使臣之體虜衆敬憚焉

李行修長慶三年為宣撫使至楚州舉費冠卿之至孝
至泗州舉刺史李宜臣之賊犯時以為奉使得人

楊於陵為戶部侍郎會李師道削平分其地為三鎮朝

廷思有所制置於陵以選兼御史大夫充宣慰使還奏合旨
梁韋震為殿中監蔡州四面都統判官時蔡將郭
璠繫秦宗權送於太祖太祖復請震奏事且疏時溥之
罪願委討伐仍請降滄兗二師之命溥既以都統破黃
巢功居第一又與兗鄆連衡結中官為內援時宰之忌
太祖者復佑之右拾遺徐彥樞亦疏請所在斬宗權不
必至京師陳獻俘之儀蓋以時溥獻黃巢止函首故也
震往復論列於天子前敢大言亦能協附執政所請事多允

李震為太祖從事乾化二年以馬殷初領湖南為雷
滿所逼帝以震骨鯁有辯命馳往和解殷滿並稟命
李珽為兵部郎中崇政院直學士時許帥馮行襲疾甚
出為許州留後先是行襲有牙兵二千皆蔡人也太祖
深以為憂乃遣珽馳往以伺察之珽至傳舍召將吏親
加慰撫行襲欲使人代受詔珽曰東首加朝服禮也乃
於卧内宣詔令善自補養苟有不諱子孫俱保後福行
襲泣謝遂解二印以授珽珽代掌軍府事太祖覽奏曰

予固知珽必辦吾事行襲門戶不朽矣

張歸弁歸於太祖得署為牙校時太祖初鎮宣武屢命歸弁結好於近境頗得行人之禮

後唐伊廣襟情灑落善專對及為汾州刺史時武皇主盟諸侯景附軍機締結聘遺旁午廣奉使稱旨


郭崇韜臨事機警言應對可觀武皇時為典謁奉使鳳翔稱旨

薛仁謙為通事舍人莊宗即位三聘於吳得使乎之體

晉劉處讓初仕後唐為客省副使累將命稱旨

李承約仕後唐為潁州團練使天成中以邠州節度使
毛璋將圖不軌乃命為涇州節度副使且承密旨往偵
之既至以善言論之璋乃受代明宗賞其能加檢校太
保

聶廷祚為太子賓客善揣人情多有材藝飲博諧戲無
所不通累奉使抗越及荆湖藩鎮侯王見者愛之亦嘗
使於契丹善待之



册府元龜卷六百五十三